

Mazarin
3700

Les Souhairs de la France ...

**RARE BOOK
COLLECTION**




**THE LIBRARY OF THE
UNIVERSITY OF
NORTH CAROLINA
AT
CHAPEL HILL**

Mazarin
3700

UNIVERSITY OF N.C. AT CHAPEL HILL



00023010518



LES SOVHAITS
DE LA
FRANCE
A M. MONSEIGNEUR
LE DVC
D'ANGOULESME



GRAND Prince, ie sçay que vous compatissez à ma disgrâce, & que vous meslez de bon cœur vos larmes avec les miennes; & puis qu'il vous fasche extrêmement de me voir auourd'huy reduite au plus déplorable estat où ie pouuois iamais estre, ie m'adresseray à Vostre ALTESSE, pour l'entretenir de ma douleur; & pour luy demander quelque remede aux maux qui m'accablent, & qui infailliblement me vont faire périr, si vous n'accourez à mon secours.

Vous auez vne longue & triste experience des calamitez que i'ay endurées; & sans vous obliger de relire les guerres que i'ay eues contre les Anglois, & contre Charles le Quint, & Philippes II. il me suffit de vous dire, que vous estes venu au monde durant les troubles des Religioneux, & dans la plus facheuse saison de cette Monarchie. Vous auez veu naistre la Ligue & les autres guerres qu'elle a produit, & ie m'assure que vostre esprit fremit encore des spectacles d'horreur qui ont paru en ce temps là sur mon theatre. La felicité du Regne de Henry IV. en auoit réparé toutes les pertes, & les François ne se souuenoient plus des maux soufferts & des disgraces passées. Sous Louis XIII. les miseres publiques ont repris de si profondes racines, qu'elles subsistent encore: Et les peuples extrêmement lassez, & autant affoiblis par les victoires que par les pertes, estoient à la veille de respirer & de iouir d'un bienheureux repos.

Vn mal-heür qui n'a point d'exemple dans l'Histoire, va r'ouuoir toutes mes bleffures, & mettre en piéces mes pauvres entrailles; va avec le fer & le feu, se repandre par toutes mes Prouinces, & va causer les plus grand embrasement qui ait iamais paru dans les monde. Et ce qui m'estonne & me surprend, est qu'on n'a point veu de guerte qui n'ait en quelque fondement, ou du moins vn legitime pretexte, & dont la fin n'ait regardé l'intérest de quelques particuliers. Les troubles de la Religion ont fomété l'ambition des Princes, qui vouloient à quelque prix que ce fust, gouverner l'Estat & posséder par force & par violence les bonnes graces des Rois. La Ligue auoit pour but l'vsurpation de la Monarchie, & elle vouloit esteindre & coupper la racine de la Maison Royale. Mais dans cette fatale & cruelle conioncture, on ne respire que le bien general, on ne travaille qu'à maintenir l'autorité souueraine, on ne cherche que la felicité publique, & on ne demande au Ciel, que le bon-heür de tous mes suiets; & la Cour est en cela d'accord avec le Palais, & tous les François crient vnanimement, VIVE LE ROY.

Il n'y a pas mesme quasi lieu de se plaindre, & si les desordres ou les necessitez publiques, ont deuoré plusieurs millions, & si les dispensateurs des deniers publics ont eu des mains, ils ne seront pas exempts de la repetition & recherche qui s'en doit faire. Vn bon reglement fermera la bouche à tout le monde, & reunira tous mes enfans. Et apres tout, GRAND PRINCE, est-il iuste que pour reparer vne faute, il faille employer vn remede pire mille fois & plus facheux que le mal mesme, & que les François versent tout leur sang les vns contre les autres, pour puis apres deuenir les esclaves de leurs ennemis, & faire changer de face à la plus redoutable & la plus florissante de toutes les Monarchies. Que diront les amis & les allies de cette Couronne? Que ne feront point les ennemis. Qu'elle gloire & qu'elle reputation produira vne telle leuée de bouchier? Quel iugement en feront les autres Nations? Et qu'en croira la posterité? Estrange auenglement! Que ceux qui sont aujourd'huy les Maistres & les Arbitres de la Chrestienté, soient peut-estre obligez demain de se soumettre, & que des victorieux ayent la honte & la confusion de receuoir la loy des vaincus.

La Reyne ne demande que de l'obeïssance, & ceux de Paris n'ont point d'autre pensée que de luy en rendre; & sans entrer plus auant dans de grandes Irruptions, n'y faire des actes inouis d'ostilité, ne vaut-il pas mieux se reconcilier de bonne heure, & n'attendre pas

que le desordre soit monté à vn excèz qui le rende irréparable.

Faites, **GRAND PRINCE**, qu'un favorable accord ou vne heureuse Amnistie preuienne vne infinité de pillages, d'incendies, de sacrileges, de violemens, de meurtres, de larcins, & de tant d'autres meschancetez qui sont en vsage, & que la guerre ciuile pratique? Et dans les mal-heurs dont l'auenir nous menace, faites voir qu'il est aussi dangereux de vaincre que d'estre vaincu, puis que les victorieux ne remporteront que de funestes trophées, & des déplaisirs immortels, d'auoir combattu les vns contre les autres.

Vostre **ALTESSE** qui est issuë de l'illustre Tige des Valois, & qui a porté les armes & trauaillé puissamment à soustenir la gloire & l'establissement des Bourbons, vous n'ignorez pas combien la guerre fait de misérables, & iusques où peut aller la licence & l'impunité du soldat; & encore en cette pitoyable occasion, où le pere est contre le fils, où vn frere medite la mort de l'autre, & où tous les parens ne pensent qu'à se defaire de leurs plus proches.

Enfin, que reuiendroit-il du sac & de la ruine de la plus belle & florissante Ville du monde, & qui est celuy qui n'en detesteroit point la solitude. Perdre les Parisiens, n'est-ce pas perdre les plus fidelles & plus passionnez sujets de ce Royaume. Dans vn mal-heur general, ne sont-ils pas capables de seruir vtilement, & il n'y en a peut-estre pas vn qui n'ait assez de force & de courage pour prodiguer sa vie, & respendre son sang pour vn Roy, s'il est estoit attaqué avec perte ou desauantage; comme il arriua lors que les ennemis s'emparerent de Corbie, & des autres villes frontieres, lors qu'ils porterent le fer & le feu dans toute la Picardie, & lors qu'ils donnerent l'espouuente & la terreur à tous les François.

C'est cette puissante & superbe Ville qui fit vn effort digne d'elle, & qui donna moyen au feu Roy de couvrir vne faute, & de reparrer l'imprudence du Cardinal de Richelieu, qui auoit laissé cette partie de l'Estat trop à decouuert. En effet, les Espagnols mesme parlant de cette Ville, se sont assez fait entendre quand ils ont publié hautement; *Vrbs prauallet orbi*: Que c'estoit vn prodige & vne merueille de la nature, par le moyen de laquelle mes Rois peuuent à meilleur tiltre, se dire Monarques, que non pas les Assyriens, les Medes, les Perses, les Grecs & les Romains, puis qu'elle est capable de leur ouurir le chemin & la conqueste de l'Vniuers.

Mais ce qui est admirable, elle ne veut point faire connoistre sa force & sa puisance que pour le seruice de son Prince & de sa Patrie;

& quoy qu'il puisse arriuer, elle veut demeurer ferme & constante dans le deuoir & l'obeïssance qu'elle doit à son Souuerain. C'est-là toutel'ambition de Messieurs du Parlemēt. Ils detestent& condamnent toutes les vsurpations, soit qu'elles ayent esté heureuses, soit que le succez en ait esté funeste. Ils ont mesme en horreur l'establisement de la Republique Romaine, qui n'a pas commencé si heureusement qu'eux, comme aussi les Suisses, qui nese sont pas liguez avec tant d'auantage, & mesme les Estats de Hollande, & les Parlementaires d'Angleterre, qui n'ont pas agy avec tant de force, n'y avec vne conduite pareille à la leur. Ils ne trauaillent que pour soustenir la grandeur & la dignité de cette Couronne, & pour rendre eternelle la Monarchie Françoisē, qui est si bien estable, qu'à vray dire, elle ne peut perir que par elle-mesme, & par la diuision du peuple.

GRAND PRINCE, agissez donc noblement, & de toute vostre force, comme ie vous en coniure, par les cris, les larmes, & le sang d'vne infinité de miserables; & faites en sorte qu'il arriue la mesme chose aux François, qui arriua autrefois aux Espagnols. Ils estoient diuisez, & auoient peine à supporter la domination des Allemans, & à souffrir l'humeur de Charles le Quint. Vne guerre ciuile s'estoit cruellement allumée en Castille, & à dire vray, elle y eust causé vne épouuentable desolation, si l'armée Françoisē, qui fut enuoyé pour la conqueste de Nauarre, se fust contentée d'auoir pris Pampelune, & triomphé en quinze iours de tout ce Royaume, mais l'imprudence & l'auarice de ceux qui commandoient les porta à entrer hostilement en Espagne, où ils ne firent autre progresz que de retinir les Espagnols diuisez, esteindre des animositez domestiques, & mettre fin à vne guerre sanglante, qui sans doute eust ruiné les affaires de l'Empereur, & donné en proye toute l'Espagne, qui en vn iour victorieux reconquit tout vn Royaume, & donna vne chasse honneste aux François.

Et apres que tout les esprits se seront reconciliez, & la Cour & le Palais estans bien d'accord, toutes les troupes Françoises iront fondre en Flandre, & forceront l'Espagne mesme de redemander vne seconde fois la Paix; & vous aurez le contentement d'auoir esfuyé mes larmes, & mis fin à mes déplaisirs, & la satisfaction d'auoir beaucoup contribué au repos public, & rendu la seureté & l'abondance à tous les François, qui auront tout le ressentiment qu'on peut auoir d'vne si parfaite obligation.

FIN.

